



Sekretaria Estadu
ba Igualdade Jéneru
no Inkluaun Sosial

LORON NASIONAL FETO 3 Novembru

DESIZAUN

COMITÉ CENTRAL DA FRETILIN

Kona-ba

LORON NASIONAL FETO

Selebrasaun Loron Nasional Feto ne'e bazeia ba istória Rezisténsia nian wainhira Heroina Maria Tapo mate iha 3 Novembru 1975 wainhira nia kontra hasoru invasór militar Indonézia iha área fronteira, Tapo, Bobonaro nian.

Hodi ida ne'e sasin sira haruka kedes karta ba Comité Central da FRETILIN deklara: "Ami feto Tapo sei la rende, ami sei la rende nafatin, ami sei funu nafatin, ami sei funu to'o ami nia ran turuk ikus liu nian."

Hafoin simu tiha karta ne'e, Primeiru-Ministru Repúblika Demokrátika Timor-Leste Nicolau Lobato halo inisiativa iha ailaran iha tinan 1976 hodi deside loron 3 fulan Novembru sai nu'udar Loron Nasional Feto. Ho nune'e iha tinan 1977 husi enkontru Comité Central FRETILIN dekreta rezolusaun ida ba loron 3 fulan Novembru



sai nu'udar Loron Nasional ba Feto Timor-Leste. Hahú husi ne'eba iha ailaran, tinan-tinan komemora Loron Nasional Feto.

Liu tiha Restaurasaun Indépendénsia iha tinan 2002, iha Kongresu Nasional Feto Daruak, iha tinan 2004, ne'ebé he-tan partisipasaun husi organizasaun feto hotu-hotu iha Timor-Leste tomak, maluk feto sira eziye katak Timor-Leste tenke iha loron nasional ba feto, atu fó valor no louvor ba feto sira

tanba sira mós fó kontribuisaun maka'as ba Luta ba Libertaun Nasional 1975-1999.

Ezijénsia ne'e sai hanesaun plataforma husi Kongresu Nasional Feto Daruak no hato'o ba Parlamentu Nasional hodi foti desizaun. Ikus mai Parlamentu Nasional aseita no halo Lei Númeru 17/13/2005, ne'ebé deside loron 3 fulan Novembru sai nu'udar Loron Nasional ba Feto Timor-Leste. ①

Funu Nain Saudoza Maria Tapo ho nia istória

Narador ba Istória :
Feliciano Cândido no Adelino Espírito Santo
Hakerek nain: Eng. Afonso

Saudoza Maria Tapo origin husi Suku Tapo, postu Administrativu Bobonaro. Iha tinan 1975 Administrativamente Suku Tapo iha knua 10 (sanulu) mak hanesan knua Tas Mil, Lon Mual, Muna, Buiba, Tas Golo, Golegusun, Holniol, Chilon, Oepo no Ole-gau. Iha tempu Indonézia knua hirak ne'e hela deit ha'at (4) tanba ema barak mak mate iha funu laran inklui Sau-doza Maria Tapo.

Tanba sá fó naran Maria Tapo?

Maria hanesan naran sarani Katólika, Tapo hola husi Suku Tapo nia naran. Uluk antes funu hahú nia naran lolos mak **Maria Uruk Bele**. Bainhira nia mate, nia feto maluk funu nain sira ezije hakarak informa lalais ba Comité Central da FRETILIN (CCF) kona-ba Maria Tapo nia mate. No sira tau naran Maria Tapo, fásil atu lembra feto Tapo nia luta hasoru inimigu iha fronteira. Maioria funu nain feto sira la

hatene hakerek no le. Feto funu nain sira seluk hanoin katak temi Ma-ria Tapo bele valoriza ona sira nia luta ba rai doben Timor-leste. Los duni, feto sira ne'ebé fó naran ne'e barak liu mak mate ona durante funu nia laran. Tanba ne'e, ohin loron ita rona Saudoza Maria Tapo iha Istória luta Timor-Leste, bazeia ba ninia koléga feto sira nia pedidu atu fó naran ida ne'e.

Identidade no Maria Tapo nia luta.

Saudoza Maria Tapo ho naran Jentia Uruk Bele, moris iha knua Buiba aldeia Oepo, Suku Tapo, iha loron 1 Janeiro 1932 no mate ho idade por volta 43. Mai husi família ida ne'ebé simples, la escola tanba ne'e nia la hatene lé no hakerek. Ninia aman naran Asa Mali no inan naran Luba Mali. Nia kabén ho Kapitaun Segunda Linha Moisés Vicente. Nia laen Moisés Vicente remata escola 4ª classe iha Colégio Infante de Sagres Maliana. Iha tinan 1975-1978 Maria Tapo nia kabén Moisés Vicente assume karagu Vice-Comandante Zona Fron-

teira Sul Bobonaro. Saudoza Maria Tapo nia kabén Moisés mós asume kargo Kolaborador Zona Fronteira Bobonaro ba suku Tapo, Leber Postu Administrativu Bobonaro inklui Lebos, Lontas no Gildapil Postu Administrativu Lolotoe nia baze iha Loeba-Leber to'o tinan 1979.

Maria Tapo iha oan nain 2; mane naran António Vicente no feto naran Bui Pelu, maibé mate hotu durante funu kontra inimigu indonéziu. António Vicente monu ba inimigu TNI nia liman iha tinan 1979 no mate iha masakre Tuluata-Buiteri, Bobonaro vila iha tinan hanesan hamutuk ho saudozu sira nain sanulu resin ida (11), tanba hahú hala'o fali klandestina ka kontaktu fali ho nia aman Moisés Vicente ne'ebé sei subar iha Tapo no Leber. TNI Bataliaun 507 rona informasaun no kaptura António inklui ema Tapo lubuk ida no oho iha masakre ne'e. Nia oan feto Bui Pelu mós mate iha masakre ida besik knua Tasgolo aldeia Oepo, iha Suku Tapo no iha tinan 1978 TNI kaptura no oho hamutuk ho matebian ida naran Leo Nando



Foto: Resisténcia Timorense

Suku Leber-Bobonaro. Maria Tapo iha oan hakiak ho naran Manuel de Jesus, agora hela iha aldeia Pippalag, Maliana.

Saudioza Maria Tapo iha maun alin nain 9 feto 3 mane 6, maun alin sira n'e mate hotu ona, maibé ninia jerasaun husi Avo ida sei moris to'o ohin loron, sira hotu he-la iha aldeia Oepo.

Bainhira funu hahú iha tinan 1979, Sudioza Maria Tapo hola parte ona iha asaun kontra infil-trasuan militarizmu indonéziu, no funu hahú tama ona iha fronteira Maliana. Iha momentu ne'eba fu-nu nain sira involve mós feto atu bele ajuda iha parte lojística atu prepara hahan no lori hahan ba *linha de fogo* atu suporta mane

sira bainhira halo funu kontra inimigu.

Saudioza Maria Tapo mós kria ninia grupu Feto Rezisténsia OPMT kuaze ema nain 40, barak liu mak mate ona. Feto rezisténsia husi nia grupu OPMT balu sei moris mak Feliciana de Jesus hela iha aldeia Oepo, Domingas Soi Daci Barreto hela iha aldeia Oepo, Antonia Cardoso hela iha aldeia Oepo no Cipriana ka Ana Cipri (Karunia), Suzana (Lolo'oa) agora hela iha Maliana Vila.

Saudioza Maria Tapo hola parte iha asaun ne'e, foun-foun funu na-in sira iha Tapo halo uluk asaltu ida ba fronteira Saburai, Maliana no Malibaka-Tapo-Memo, inimigu sira tama mai husi mota Malibaka fronteira Timor-Leste. Maioria fu-

nu nain husi Tapo, Bobonaro kaer kilat no prontu ona halo funu kontra inimigu indonéziu. Ema hirak ne'ebé kaer kilat ne'e barak liu la iha es-periénsia, ema lubuk oan ida deit ho es-periénsia Tropa Portugués nia tempu no han-orin mane maluk funu nain sira oinsá atu tiru no halo asaltu. Saudioza Maria Tapo mós akompaña maibé nia la kaer kilat so hare deit mane sira sobu, monta no tiru kilat.

Saudioza Maria Tapo hamutuk ho feto maluk seluk loron -loron tein no lori hahan ba *linha de fogo* besik fronteira. Nia feto ida ne'ebé la hatene lé no hakerek maibé iha tal-entu atu enkoraja mane sira halo funu hasoru inimigu,

asaun hirak ne'e nia halo tanba sempre suporta mane sira atu halo funu kontra inimigu Tentara Indonéziu, exemplu konkreta ida mak Maria Tapo temi "se mane sira imi tauk diak liu tama deit ami nia lipa laran no entrega kilat ne'e ba ami feto sira mak halo funu." Ho espiritu suporta ne'e hafanun mane funu nain sira iha Suku Tapo Bobonaro la tauk mate no la rende no avansa nafatin.

Atividade saudoza Maria Tapo prepara aihan no lojística ba ninia kaben Kapitaun Moises Vicente ne'ebé halo vijilansia iha *linha de fogo*. Antes to'o nia kabben ninia abrigo, inimigu hetan sira no avansa tiru mate Sina Mau, maun boot husi Saudoza Maria Tapo eskoltu Moises Vicente, ne'ebé akumpañia feto sira lori hahan. Ho laran triste no brani saudoza Maria Tapo foti kilat mauzer husi nia maun Sina Mau nia liman tiru malu ho

inimigu TNI. Haree akontesementu ne'e feto barak ne'ebé lori hahan hakilar lalika tauk, mate ka moris ukun rasik aan, Viva FRETILIN. Ho aten brani nafatin saudoza Maria Tapo tiru hasoru inimigu, maibé saudoza Maria Tapo hetan tiru husi inimigu no hakotu iss iha área entre Genggot no Belgu fronteira Maliana. Bainhira saudoza Maria Tapo mate, inimigu mós rekoa kedes, nia kaben Kapitaun Moises la konsegé salva nia tanba inimigu hetan uluk sira ne'ebé lori hahan no eskolta ne'ebé akompaña feto sira. Iha tempu ne'eba nia kaben to'o iha knua hetan deit nia kaben saudoza Maria Tapo ho nia eskolta mate tiha ona.

Nia feto maluk sira no mane funu nain sira ajuda hulan nia isin mate lori ba halo'ot/hakoi nia iha cemitériu Buiba-aldeia Oepo. Tuir cultura Tapo, mate isin Maria Tapo la hakoi hamutuk ho mane funu nain sira iha *Tell Poh/Rate Lulik* iha uma lulik Tapo nia Tanba nia feto.

Mate isin lori liu ba Buiba fatin moris saudoza ninia. Agora dadauk muda ona nia urna no halo'ot ona iha cemitériu Santa Cruz Tapo, nia rate besik los estrada ninin, ema barak bele visita karik liu dalan ba Postu Administrativu Lolotoe. Mate isin Sina Mau maun husi Maria Tapo hakaoi iha *Tell Poh/Rate* besik iha Uma Lulik Tapo.

Depois hakoi tiha isin mate, ninia grupu OPMT ejiji ba nia kabben Moises Vicente Vice Komandante, tanba nia mak iha radio komunikasaun/radio recall atu hato'o kedes informasaun ba Prezidete FRETILIN Saudozu Nicolau Lobato, Presidente Repúblika Francisco Xavier do Amaral no Comite Central da FRETILIN, hodi dehan "Feto Tapo sei la rende, ami prontu atu mate ba ami nia rain, Viva FRETILIN, mate ka moris ukun rasik aan."





Tanba ne'e ikus mai ita rona iha tinan 1977, diresaun Comité Central da FRETILIN konkorda atu selebra loron tolu (3) fulan Novembru hanesan Loron Nasional ba Feto Timor-Leste. Ami rona anúnsiu ne'e iha ailaran-parté Loeba, fatin konsentrasaun FRETILIN inklui, Organizaçāo Popular da Mulher de Timor (OPMT) no populasaun Tapo.

Istória kona-ba saudoza Maria Tapo hanesan istória ba feto funu nain sira seluk ne'ebé defende ninia rai. Ami hanoin ema barak presiza hate-

ne, se bele istória ne'e hatama ba Istória Nasional iha prosesu aprendizajem ba alunus sira. Tau mós iha Arkuivu Muzeu Rezistēnsia Timorense, Ministériu Solidariedade Sosial nomós iha Municípiu Bobonaro, atu nune'e hakbiit no enkoraja ita nia oan sira atu hatene lolos ni-nia funu nain sira nia luta hodi liberta rai doben Timor-Leste.

Informasaun Adisional, hakarak klarifikasi katak Sina Mau la'ós Saudoza Maria Tapo nia kabén

(versaun Rede Feto Timor-Leste/publika iha: 1:17AM, temi Siga Mau Saudoza Maria Tapo nia kabén), mai-bé ninia maun bo'ot ne'ebé sai eskoltu ka guarda-costa Kapitaun Segunda Linha Moisés Vicente. Kapitaun Moisés Vicente rasik monu iha emboscada inimigo no mate iha tinan 1979 iha Maliana tanba hetan sona ho bee malirin husi TNI sira.

Tapo, 3 Novembru 2016



Viva Timor-Leste!
Viva Feto Timor-Leste!
Viva Funu Na'in Tapo Sira!
Viva Comité Central da
FRETILIN!
Mate ka moris ukun rasik an!
A Luta Continua!



*Istória badak ne'e prepara husi
 Feliciano Cândido, Kontaktu: +670
 77 26 637, hela iha Suku Tapo
 Postu Administrativu Bobonaro.*

*Iha tempu rezisténsia 1975-1981
 Feliciano Cândido assume kargu
 Comandante Pelotão ba
 FALINTIL nu'udar mós hanesan
 Sekretáriu Suku Tapo no
 Delegadu FRETILIN. Iha tinan
 1982 servisu hanesan Mestre no
 Diretor Eskola Primária Tapo, no
 ohin Ioron sei assume knaar han-
 san Diretor Escola EBC Tapo.
 Hakerek nain:*

*Eng. Afonso A.J. Cândido, MA. Kontaktu:
 + 6 7 0 7 7 2 4 2 5 3 0 E mail:
 afonsoc4@gmail.com facebook Afonso
 Cândido hela iha Dili. Alumni University
 of the Philippines Los Banos (UPLB)-Filipi-
 nas bei oan husi inan bin alin Saudoza
 Maria Tapo. Bele mós kontaktu Adelino
 Espírito Santo, Tel: 77079159, Feliciano
 nu'udar família no oan husi inan bin alin
 saudoza Maria Tapo.*

*Editor Mestre Domingos Martins, M.Ed,
Formador Estudu Jeografia. Istória ida
 ne'e sitasaun husi diskusaun oral husi
 narador sira.*



KOMEMORASAUN LORON NASIONAL FETO

3 NOVEMBRU 2017

“Valoriza Feto Sira Nia Luta
Hodi Kontribui ba
Dezenvolvimentu Nasional”

